

2 Korin

¹ Ẹta, Kótóné ama kisipa mole ala sya furaalu, so whì tẹteróló kaae tare whì Yesu Kerisoné kutó dirópóló dotẹyale *apospel* whì Pol-né dapó.

I dere așeta ɗané no Timoti ɗamo wusuró bituraalu, diɗ Akaia hae kwiamó Kótóné kae betere so whìró, ai hae kwiamó tẹne Korin bemó betere Kótóné fake so whìtamopaae dapó.

² ɗané Aya Kótóró ɗa tẹteróló kaae tare Tale Yesu Kerisotamoné hamokoróló haɓe tao sere alaró, hosaa muni deyóló dua betere alatamo diɗpaae erópóló yae.

Kótóta kọleturaalu tao sóró haɗi kisipa mulatere Talepó

³ ɗa tẹteróló kaae tare Tale Yesu Kerisoné Alima Kótóné doi hale sóró horópóló yae. Ti ɗta, kọlené sukutere ala kaaratere Aya bitu, sekeɗi ala wapakélé kisipa feléróló tao su betere Kótó betera pọ. ⁴ ɗané sekeɗi alarape feata, ama tao sóró ɗa kisipa felérótua dapó. Kótóné ɗapaae ai ala erótua dereteita, mepaae so whì kae kae seke tuamó betepa, Kótóné ɗapaae ai male kisipa feléraletere alané atimamo tao sọpóló erapó. ⁵ Ti noatepae, Yesupaae erale doasi susupui ala feleyóló furaalu, ɗapaaekélé mo dekeró wou betera pọ. Atétu, ɗané sekeɗi alakélé Yesu Kerisoné tao sóró, ɗa kisipa felératere ala mo dekeró erateretei faaturaalu, feleyóló mepaae so whìpaaekélé fu betera pọ. ⁶ ɗa sekeɗi ala su betereiteita haɓe mei,

diã feléyóló betóo, aluyaqsóro tao sóo, yópóló dapó. Atétu, Talené dã tao sóro kisipa felératepa, ti diãkélé feléyóló betaalopó. Dãtamo Kótóné kisipa felératepa ala depa, ti aita, diã feléyóló beterópóló dapó. Dãpaae wou betere susupui ala kaae, diãpaaekélé wapa, ti ai eraterere feléi alané ai susupui ala hãle belée tanópóló, diã fotokõ bulatapó. ⁷ Diã take mo wisiyóló betaalopóló, dãné mo diriyóló kisiparapó. Ti noatepae, dãpaae wou betere susupui ala kaae, diãkélé ai su betere ape. Atéterere kaaetóro, dãpaae erótu betere kisipa felératepa ala diãkélé saalopó.

⁸ No nerape-ó, dã Esia hae kwiamó betepa, erale sekei alarape diaaõ kisipa yaasepóló dapó. Mo doasi sekei alané dã só deró betaleteiné, beleyaaire mo sunipó. Atéru dã mo sukutere dãlemó beterapóló kisipa mualepó. ⁹ Ita mo dapó. Dãné hosaa tuãmó mo turó muale kisipata, dã mo sukóló mole nisi yalepó. Téyaletei, dãpaae ai erale ala dãné sumó belenére nisi yaqsóro, sukãle so whi kepaarótu betere Kótópaae kisipa tirópóló yalepó. ¹⁰ Dã felekemó mo ti dóló aluraletei, ama dã tao su yale kaae, nalopaaekélé atérótóro tao saalopó. Tétu diaaõkélé dã tao sóro momarótu betepa, ti Talené dã aluyaqsóro tao sere ala hãle yó tareteiné dã hãtamo ãpaae kisipa tiró beterapó. ¹¹ So whi feané dã tao sóro momatu betere ala mo dokonóturaalu, Talené hamokoróló hãle tao sereteimó dã so whi feané ãpaae mo kée yaalopó.

Polo-né folosóro yaai kisipa muale ala fisikóló taarale fo

12 Dá i haemó betó mole so wh̄i kuamó kutukélé, dī Keriso so wh̄i kuamó kutukélé, Kótó tuamó wale mo kae ere alaró tó tikiné ini, kisipa mo turóné dere alatamo dá tuamó mupa, so wh̄i feané kelalepó. Atéro kutu yale ala d̄ané kisipa faroló taletapa h̄oko ala ini, feané keletómó mo donoi ala yalepóló dá h̄ajturaalu, bopé fake dapó. Atétu betaleteti i haemó mole kisipa sya fóló ini, Kótóné hamokoróló h̄ale tao sere ala sya furaalu yalepó. 13-14 Ti noatepae, d̄ané dīapaae i as̄ dere fota, hapóluni, diaā dos̄ayóló sumó kisipanérápó. D̄ané du betere ala mepaae diaā kisiparetei, mepaae dī kisipanipó. Téretei, take nalopaae ti diaā mo turó tū yaalopóló kisipa mutapó. Take dá t̄eteróló kaae tare wh̄i Yesu wale sukamó d̄ané dī kilitu, h̄ajyóló bopé fake yaaire kaae, diaākélé dá kilituraalu, h̄ajyóló bopé fake yaalopóló, kisipa mutu i dere ape.

15 Ai betené, ̄ mepaae faai folosóro dī beteréro waairaalu, ̄la ̄la taleyóló mulalepó. Até yaleteita, ȳlo yó matere fo tuamó bole wisi ala dī tamo félimó s̄póló yalepó. 16 ̄ Masedonia hae kwiapaae furaalu, dī keleté wóo ̄ momó fesaae woukélé dī keleté wóo, yaai yalepó. Atéro ̄ aipaae wapa, ti diaā ̄ tao sóro Judia hae kwiapaae dotonaasepóló kisipa mualepó. 17 Ȳlo ai muale kisipata, bete munipa h̄oko yaleé? Ó i haemó mo wh̄iné kisipa kaae mulu, ̄pó téyaalopó dutei, momómo meipó du dere kaae yaleé?

18 Tényi, Kótóné ama yaalopó dere ala motóro du dere kaae, d̄ané dīapaae yó mótu betere fota, ̄pó, dutei meipó, fo kae dumipó. 19 Ti

noatepae, diã kuamó ę Pol, Sailas, Timoti, da sore whırapené Kótó Naalema Yesu Keriso i kaae whıpóló, diã tuãmó yó móturaalu, ama ępó dutei meipó, dere fokélé erapóló diãpaae yaleé? Ai fo ini, Kótóné ama eraalopó deté wale fo fea Yesu tuãmó dokonóturaalu, ępó, téyaalopó fo betã deté konapó. ²⁰ Ti noatepae, Kótóné ama mo eraalopó yóló muló betere forape fea, da tętéróló kaae tare whı Keriso tuãmó mo dokonóturaalu, ępó, fotóró mulapó. Atéreteiné, Kótóné doi doasi mulóló, da Yesu tuãmó bitu mo kée, téyópóló yae, fo dua dapó. ²¹⁻²² Dãkélé, diãkélé, da tętéróló kaae tare whı Keriso tuãmó diriyóló beteratere alata, Kótóné amatóro dua dapó. Da Kótóné ama so whıpóló sóro beterótu, topomó wel wei suni yóo, da mo amapóló siriróo, take dãpaae wisi ala eraalopó kisipa muópóló, ama Dęi Kepe Wisi dãné hosaa tuãmó beteróo, erapó.

²³ Kótóné keletómó yało mo fo i dere ape. Ę fesaae wou ai Korin beró diã foné siré waai yaletei, dei kisipa muaqsóro taaralepó. ²⁴ Dãta, diaaę kisipa tiki tiratere ala tętéróló kaae tare doasi aęyóló bitu dumipó. Tépateti, diã haiyóló beterópóló kisipa mutu, da diãtamo kutó betãmó ditu beterapó. Ti noatepae, diaaę kisipa tiki tiratere alané betã diã mo diriyóló beteranérapó.

2

¹ Ę diã beterepaae waai kisipa mualetei, take yało diã deteraayóló foné supa, diaaę hosaa tuãmó seķę su yale kaae, momó yaqsóro taaralepó.

² Ti noatepae, yałotamo diã foné sóro só deróló

sekei kisipa mulatepa, ti ę hękese yaaitere alamo, né eraaloé? ³ Yalo diąpaae aseýale fota, ę dią beterepaae wale sukamó hękesei ala eraai yale so whinėtei, ępaae doasi sekei ala eraqsóro yalepó. Ę tuamó mole haj diaaqkélé saai kisipa mutu, yalo dere fo mo wosóló sya fenérápóló kisipa tiralepó. ⁴ Ti noatepae, yalo diąpaae ašeturaalu, hosaa tuamó doasi dekeyóló wole dua yalepó. Ita, dią dele sóro hosaa supu yópóló dumitei, yalo diąpaae mo turó yaala sókó fole ala kisipa yópóló dapó.

Dowi ala yale whiné ama dowi ala kwia hęle kemberae yale fo

⁵ Whi me dené me whi hosaa tuamó sekei ala erélipa, ti ę maaté hosaamó sópóló ini, dią feapaaekélé eralepó. Aita dowi alatei, mo ti doróló aluraterere ala meipó. ⁶ So whi feané ai whi foné sóro haleraletei şupa, mió momó ini taalae. ⁷ Ai whi ą sekeş duraalu mo ti haepaae derepaqsóro ama yale dowi ala kwia tani, me ęla meipóló kisipa keteróló, ą tao sóro ketekeş bulóló fo wisitei yae. ⁸ Atéro diąné yaala sókó fole ala ama kisipa yópóló, ąpaae hękeamó yae yóló diąpaae i dere ape. ⁹ Yalo diąpaae yae yale fo fea diaaq wisiyóló wosóló sya fuléro kęae kelaai kisipa mutu aseýalepó. ¹⁰ Diąnétamó me whiné dowi ala kwia tani kisipa keteratepa, ti yalokélé ai whiné yale dowi ala kwia tani, hęle kemeratapó. Ai whiné me dowi alatamo itikimó, ti dią wisiyóló beterópóló tao saairaalu, yalokélé Kerisoné keletómó kemberalepó. ¹¹ I dere fota hęle mei, Satan-né dilikóló dąné dere ala doraqsóro

dapó. Ti dāta, hāle mokḡleyaayóló bitini, Satané so whī doraai dilikitu betere ala dāné mo kisiparapó.

Talené ama yóló muló betere fo wisi tuḡmó ama kae ere dę fāanapó

¹² Ẹ Troas bemó betere so whīpaae dā tẹteróló kaae tare whī Kerisoné fo wisi yó melaai felemó, ai fo yó melópoló Talené tẹ doasi muló betepa kelalepó. ¹³ Aimó kutó diyaaai yaleteti, yaḡo no Taitus bitinire betené yaḡo hosaa muni derepéni kisipa sekętepa, ai so whīpaae kęleó fomaaté yóló ę Masedonia hae kwiapaae felepó.

¹⁴ Tépateti dā Keriso tuḡmó betepa, Kótóné ama bóe whī dóló tẹteróló sale ọlapóló betere dokḡ hākeamó hękesetamo dapesó fu beterapó. Atétere alané me ọla felé kęlaa wisi woutere kaae, Kótó ą etei kaae Tale beterapóló so whī feapaae yó mótu beterapó. Atéreteimó, Kótópaae mo kée du betenérápó. ¹⁵ Kerisoné Kótópaae hāle matere ọla tuḡmó sókó wale kęlaata ti dāpó. Ti ai kęlaata, aluyaḡsóró tao sere so whīpaaekélé, sukóló mo ti aluyaaire so whīpaaekélé wou beterapó. ¹⁶ Dā i fo yó matere whīrapeta, mo ti alu du betere so whīné kulumumó ti sini ọla kęlaa kaae wóo, aluyaḡsóró Kótóné tao su betere so whīné kulumumó, ti mo betere felé kęlaa wóo, du beterapó. Atei kaae hapólui ala mé whīné sūmó enére? ¹⁷ So whī feané *moni* saai kisipa mutu, Kótóné fo yó mótu dere kaae, dāné dumipó. Ai ala ini, Kótóné keletómó ama dotęyale whī aḡyóló Keriso tuḡmó bitu, mo wisi kisipatamo mo fotóró yó mótu beterapó.

3

¹ Dãnétei dã yó matere whĩpóló dukiratere fo momó yaai dapóló de? Ó dãta etei kaae so whĩpó kisipa yópóló asęyóló matepa só fole whĩrapené dere kaae dãné de? Mepaae whĩrapené dere kaae, dã etei kaae whĩpó yópóló, asękó eróló diãpaae yó melaai, ó diaağ dã melópóló wosetere nisi de? ² Aita ti diãtóró iru, dãné hosaa tuãmó asęreteiné so whĩ feané kolóló dosãnerapó. ³ Diãta, dã tętéróló kaae tare whĩ Kerisoné asęreteiné diaağ du betere ala so whĩné kilituraalu, ita Pol-sépiné diale kutómó oleyale dupóló hãkearatapó. Aita mo asętere węiné ini, mo ti betó tare Kótóné Kepe Wisiné eró beterapó. Ai asęta, mo kane fake tómó ini, so whĩné hosaa tuãmótóró erapó.

⁴ Ai ala erémólópóló tuę tamo muluraalu dumi, Kótóné keletómó dã tętéróló kaae tare whĩ Kerisoné dã fotokęratepa, mo ere alatóró halaaainé dapó. ⁵ Ai alata, dãnétei kaayóló ipakó, dãné yalepó fo enénipó. Aita, Kótó ą tuãmó ere alané dã sęratepa du beterapó. ⁶ Ti Kótóné ama kutó diratere whĩ bitu, ama so whĩ tao saalopóló mulale dirii kisi fo erópóló, ama fotokę dãpaae mo sęralepó. Ai fota, asęné ini, Dęi Kepe Wisiné eró beterapó. Ti noatepae, asęre foné dã dóló sukunateretei, Dęi Kepenéta, dãmó mo ti betere bete mótu beterapó.

Kale kisi fo tuãmó ama mo kae ere dę wisinaale fãanapóló ere fo

⁷ Take Moses-né Kótóné ala eróturaalu, kane fake tómó asęyale fo yó malepó. Ai foné so

wh̄ipaae sukutere alatei eralepó. Ai alata, d̄e wisinaaletamo weipakalepó. Ai d̄eta, alu deté faaipatei Moses-né kelepaa d̄eyó faleteiné, kele det̄eliru Israel fake so wh̄iné ama kelepaa diriyóló kilini ipakalepó. ⁸ Mió D̄ei Kepe Wisiné erótu betere alatamo wale d̄ené take ai alatamo wale d̄e mo ti bosenó bitinipóló de? ⁹ Kale tukóló muló betere fo sya furaalu du betale alané, so wh̄i fea taleyóló só deró beterepó. Ti ai alata, Talené d̄e wisinaaletamo weipakalepó. Téyalet̄ei, mo donoi so wh̄ipó dere ala tuámó wale d̄ené kale folosóró wale d̄e mo ti bosenó beterepó. ¹⁰ Ti take alatamo wale d̄e kolósu, mió ere alatamo wale d̄e kolósu depa, mió ere alané d̄e mo doasi ereteiné take wale d̄e h̄ale ɔla kaae aɔró beterepó. ¹¹ Take mo h̄aleke sukamó maaté yóló alu deté fele alata, d̄et̄amo walepó. Téyalet̄ei, mo ti deté fu betaaire alatamo wale d̄eta, mo doasipó.

¹² Take nalopaae d̄a atei wisi ala tuámó be-taalopóló kisipa mutu d̄a wini, halaainé Talené ala i erótu betere ape. ¹³ Moses-né kelepaaamó ere d̄e alu deté folet̄ei, Israel so wh̄iné kelaɔsóró, kutiné husurótua ipakalepó. Mió d̄ané ai yale kaae enénipó. ¹⁴ Tépat̄ei, take atimané kutiri hapólu ipakalepó. Atére kaae, take atimané kutiri husirale kuti miókélé h̄ale iru, take tukóló mulale fo dos̄atepakélé, atima tūɛ hapólutóró yó tarapó. Ai husiró betere kutita, mené d̄aae faranénitei, Keriso tuámó betere alané bet̄a d̄aae faranérápó. ¹⁵ Mió i alimókélé, Moses-né as̄ere fo dos̄atu betepatei, atima kisipa tiki hapóluru, hosaakélé h̄ale t̄are alata, kutiné kelepaa husuró

betere kaae erapó. ¹⁶ Tépatéi, mepaae so whi de Talepaae kisipa feteyóló wapa, ti ai husiró betere ala kuti kaae d̄aae fótu betera. ¹⁷ Tale ̄ta, mo Kepetóro betera. Talené ama Kepe betere tikimó me alané dokoni, teraae fólo h̄ale betera. ¹⁸ Mió kutiné kelepaa husirénire so whi d̄apaae Talené ama ere d̄e wisinaale erótu betera. Ai d̄e d̄ané kaae tapa, ti mepaae so whiné d̄a tuamó ai ere ala kelenérápó. Tétu, d̄akélé Talené ama aso kaae betera, ama wisiraté fu betera. Ti ai d̄e wisi erótu betere Kepeta, Tale ̄torótípó.

4

Mo haené aleale wutimó doasi ke bole ̄larape derapólo ere fo

¹ Atérené, Kótóné ama d̄a ̄leturaalu, tao sóro melale kutó h̄oyóló taaréni, h̄ale dirótu betera. ² Atéturaalu, kikití kinóló dere alakélé, enénire halei alakélé, kapala dilikitere alakélé, Kótóné fo doróló w̄eratere alakélé, d̄ané mo dumipó. Ai ala ini, Talené ama mo fo yó mótu betera, so whiné hosaamó sópóló, Kótóné keletómó mo h̄akeamó erótu betera. ³ D̄ané i yó mótu betere fo wisitamo mepaae so whiné wosaairetei hapóluyóló husuró betepa, ti aita mo ti aluyaaire so whi ai ape. ⁴ Ti mió i alimó t̄eteróló kaae tare kapala kótóné Talepaae kisipa tiki tirénire so whiné ai fo wisi tuamó ere d̄e wisinaale kelaşóro, atimané kisipa hapóluróló husiralepó. Ti aita h̄ale mei, kale fo tuamó Kótóné aso kaae betere whi Kerisoné ere d̄e wisinaale kelaşóro

erapó. ⁵ Ti noatepae, dāné i yó mótu betere fota, dātei doi sóró horótu dumi, Yesu Keriso ą Talepóló ama doi sóró horótu beterapó. Atérené dā Yesuné ala eróturaalu, dią tao sóró diaaą kutó diratere whįrape i betere ape. ⁶ Ti noatepae, “Diliki tuąmó dęyó fae,” yale Kótónétóro dāné hosaa tuąpaae dęralepó. Ai dęta, dā tęteróló kaae tare whį Keriso ątóro ereteiné dāné ą kaae tapa, ti Kótóné ama eré dę wisinaale kisipa enérapó.

⁷ Tépatei, ai bope deté wale ke bole ọlarapeta, mo haené aleyale wutirapemó deró beterapó. Ti fea ala dā tuąmó kaayóló dumi, Kótóné ama fotokọ dā tuąpaae sųratepa dapóló, so whįné kisipa yọpóló erapó. ⁸ Kotere tiki dokọ sekei ala dąpaae erótu betepatei, ai alarapené dā haepaae deróló, mo ti só derótimpó. Dā noa ala yaalorópóló kọló kọló epatei, dāné kisipa mo ti fomaake inipó. ⁹ Talené ala erateremó, dąpaae susupui ala erótu betepatei, Talené dā taaló bitini, tao su beterapó. Mepaae so whįné dā só deróló dorótu betepatei, mo ti dorótimpó. ¹⁰ Yesu ą kepaaróló beterale fotokọ dā tuąmó mupa so whį feané hąkeamó kolópóló, ą sukąle ala dāné tikimó mupa kutu beterapó. ¹¹ Ti noatepae, sukuni dā betere whįrape Yesuné ala erateremó dā dóló aluranépatei, ama betere bete dāné mo tó tikimó mupa so whįné hąkeamó kolópóló, yó maté kutu beterapó. ¹² Ti Talené ala erótu betereteiné sukutere ala dā tuąmó mupatei, dią tuąmóta, mo ti betere bete moleteiné dią mo beterapó.

¹³ Aşemó i fo erapó.

“Talepaae kisipa tirale betené yalo ai fo yalepó.”

Ai fo yale wh̄i ʔ kisipa tiki tirótu yale kaae, ɖəkélé atéru, diɖpaae i yó mótu betere ape. ¹⁴ Tale Yesu kepaarale sekéné ʔ kepaarótu yale kaae, ɖəkélé kepaaróló ʔ betere tikimó ʔtamo touróló betámó beteraalopóló kisipa mutapó. ¹⁵ ɖané diɖ tao su betere alata, diɖ mo wisiyóló beterópóló kisipa mutu du beterapó. Até dereteiné, Talené so wh̄i hamokoróló h̄ale tao siré fóló, mo ti fakeraalopó. Atéturaalu, ai so wh̄i atimanémo, Kótópaae mo kée dere fo dekéro yó tapa, ti mo kae ɖɛ f̄ane Kótóné doi doasi saalopó.

¹⁶ Atéyaalopóló kisipa mutu, ɖané ditere kutó fomo duraalu taaraalomeipó. ɖané mo tó tikita, do deté fu betereitei, ɖané kepe tuɖpaae ti betere dokɔ kisi wh̄i aleraté fu beterapó. ¹⁷ Ti noatepae, ɖapaae erótu betere sek̄ei alarapeta, h̄aleke sukamó maaté muaaireteiné ɖané s̄umó belenérápó. Ai sek̄ei alarapenéitei, take nalo mo ti muó tawaaire ɖɛ wisinaale ɖapaae eraalopó. Ai eraaire ala wisi kolósu, mió su betere sek̄e kolósu depa, mo h̄ale ɔla aɔrapó. ¹⁸ Atéreteiné ɖata, ɖané kelené kelere ɔla kaae tani, kelenire ɔla kaae tarapó. Ti noatepae, kelené keletere ɔlata, mo h̄aleke sukamó maaté muaalotei, kilinitere ɔlata, ti mo h̄ale muótóro tawaalopó.

5

Dɔ mo ti betaaire be hepen-mó erapóló ere fo

¹ I haemó ɖɛ betere kapala furu be fisikó fupa, ti me ɔla meipó. Ti noatepae, mo ti be Kótóné ɖámó hepen-mó t̄enó beterapó. Ti ai beta, mo wh̄iné naasené t̄enipó. ² Ai bepaae faai ɖɛ i

haemó hãle bitu, mo kuti derótu dere kaae, hepen bemó tẽne be atéro derãnee yóló doasi kisipa mutu beteraþó. ³ Ti atei kuti deratere be demó, mepaae whĩné dã tiki daapi hãlepa kelaalomeipó. ⁴ Dã i haemó kapala furu bemó bitu, sekeji ala beleté furaalu, i be taaróló fenée yóló doasi kisipa mutu beteraþó. Ti dã daapi hãle betaai kisipa muni, dã betaaire hepen beta, kuti derótu dere kaae deranee du beteraþó. Téturaalu, mo ti betere alané sukutere ala ɔla kaae nó deróló, ama tikitóro alée faalopó. ⁵ Kótóné dã atéro aleyóló betero betereitea, ti i bope yale mo ti betaaire tiki wisi saalopóló kisipa mutu erapó. Ti aita, nalopaae eraaire ala mo turó saalopóló kisipa muóþóló, Kótóné dãpaae Deji Kepe Wisi melaleþó.

⁶ Térené, dã i haemó mo tó tikitamo hãle bitu, Taletamo betãmó bitinipó. Atéþatei, take nalo Taletamo betãmó betaaire ala dãné diriyóló kisiparu whaaliani, betere dokɔ dãné kisipa tiró beteraþó. ⁷ Dã mió i betereitea, kelené keletere ala sya furaalu ini, tué tiki tiratere ala sya foletéiné beteraþó. ⁸ Dã i daale tiki taaróló, Taletamo betãmó betaaire kisipa mupatei, ai ali sókó waai teópa, dã wisi kisipatamo kaae taté fu beteraþó. Ti nalopaae ai ala mo eraalopóló kisipa mutu, dã halaainé beteraþóló i dere ape. ⁹ Térapa, dã i betere tikimó ó kae tikimó betepakélé, me ɔla meipó. Ti Tale ɔ kisipa felé yaaire ala betã dãné doasi keteké buóló du betenéraþó. ¹⁰ Ti noatepae, dã tẽteróló kaae tare whi Keriso so whi taleyaai betere tikimó betepa, dã so whi fea taleyóþóló, betã betã yóló daaneta yaalopó. Atépa, dãné yale

ala fea hākeamó taleyaalopó. Atéturaalu, da mo i tiki daayóló bitu yale wisi alamó, ti wisi dupu melóo, hōko yale alamó ti dowi dupu melóo, yaalopó.

So wh̄iró Kótótamo bóe fióló betamó beteratere ala

¹¹ Térapa, so wh̄i feané du betere alamó Talené kwia melaairetei hāsóko feni, mo yaalopóló da wituraalu, so wh̄ipaae dowi ala taaróló, tūe tiki feteyae yóló, dotopo du beterapó. Ti da betere alata, Kótóné mo hākeamó kelerapó. Atére kaae, diaaokélé da etei kaae wh̄i beterapóló diriyóló kisipa eranée du beterapó. ¹² D̄ané dīapaae i dere fota, diaā da dukirópóló dumitei, d̄ané du betere ala kilitu, dī hāi yópóló dapó. Tétu, hosaa tūamó ere ala kilini, tó tikimó ere ala kilitu betere wh̄irapené da erateremó, atimapaae tokó melaaire fo i dere ape. ¹³ D̄atamo topo doyoóló keyaa fole wh̄irape āpa, ti Kótóné ala eróturaalu dapó. Motamo wisi kisipa mole wh̄irape āpa, ti dī tao saairaalu dapó. ¹⁴ D̄ané i du betere ala feata, Kerisoné ama yaala sóko fole ala wisiné da ketek̄e bulatepa dapó. Ti noatepae, so wh̄i mo fea tao saai bet̄a wh̄itóró suk̄alépó. Téturaalu, ama so wh̄ikélé fea ātamo bet̄amó suk̄alépó. ¹⁵ Ti so wh̄i fea tao saai ā suk̄ale alata, betere so wh̄i maaté wisiyóló betaaire ala ini, atima tao saai sukóló kepaayale sek̄éné ama kisipa mole ala bet̄a erópóló yalépó.

¹⁶ Atérené da mió i alimó kaae sóro bitiré furaalu, mepaae so ó wh̄i i haemó mole kisipa sya fóló, etei kaae so wh̄i beterapóló d̄ané tale

dumipó. Ti taketa, ðané i haemó mole kisipa sya fóló, ða tẹteróló kaae tare whị Keriso atéro tale yaleteti, mió ðané momó kae dumipó. ¹⁷ Tẹrapa, mepaae so whị Keriso tuámó betepa, ti ai so whị Kótóné kisi kaaróló beteroó beterapó. Atétere alata, take betale ala mo ti kemeróló, mió kisi ala tuámó ai betere ape. ¹⁸ Atéro beterate ala feata, ti Kótó beteremó kaayóló walepó. Ðaró Kótótamo bóe du betaleteti, Kótóné Keriso sukópóló maleteiné bóe firóló touralepó. Atére kaae, mepaae so whịkélé Kótótamo bóe fiyóló dua betere ala ðapaae malepó. ¹⁹ Aita hẹle mei, i haemó betó mole so whịné Kótótamo bóe du betepa, Kerisopaae erale alané atima yale dowi alamó Kótóné kwia melaai yaleteti taaróló, bóe firalepó. Tétu, Kótóné so whịtamo bóe fiyóló betámó beterate fo yó maté kwẹyópóló, ða sóró beteralepó. ²⁰ Atérené, mió ða Kerisoné ama fo eraterere whịrape i betere ape. Ðið so whị Kótónétamo bóe fiyóló touyóló betaaire fo ama ðiðpaae yaalopó yale kaae, “Kótótamo bóe fiyóló betae,” yóló Kerisoné doimó ðané ðiðpaae dirii ma fo i dere ape. ²¹ Yesu dowi ala inire whịtei, Kótóné ẹ dowi ala dere whị aqralepó. Ti aita hẹle ini, ða Yesu Keriso tuámó betepa, Kótóné ama so whị donoraaire ala dokonótu, ða mo donoi so whị aleróló beteralepó.

6

¹ Ða Kótótamo betámó ama kutó diraterere whị bitu, ðiðpaae Kótóné hamokoróló hẹle tao sere

ala eratepa, ai ala hãle ɔla kaae deɓaae mu-
laɔsóró, diãpaae ma fo i dere ape. ² Ti noatepae,
ama i fo dapó.

“So whi yãlo hãle hamokoróló tao sere alimó
dialaɔ eɓaae tao sae dere fo yãlo mo wosóo,
diã aluyaɔsóró tao saai tukóló mulale be
demótóró yãlo diã tao sóo yalepó,” erapó.

Yãlo diãpaae mo i dere ape. Mió i sukamóta, so
whi aluyaɔsóró Kótóné hamokoróló hãle tao su
beterapó. Ai ala yaaire be de me kae mei, mo
miótóró i ape.

Pol doasi sekɔ sale fo

³ Dãné so whi tao saai erótu betere ala mepaae
whirapené bete muni, hɔko ala nisiyóló faletu
só deraɔsóró, mepaae so whi Kótópaae waaire
tu sesé yóló dée nalatere ala dãné mo dumipó.

⁴ Aténi, dã Kótóné kutó diratere whi bituraalu
ditu betere kutó dialaɔ kolóló, i whirapené mo
donoi ala dapóló kisipa yaasepóló i dapa wosae.
Ita doasi depe tukó wei kutópatei hãle diyó taru-
raalu, sekei alakélé, ɔla ɔla yãɔtere alakélé,
whaalia dere alakélé, wou betepatei dãné hãle
belée tarapó. ⁵ Dã kotere tiki dokɔ fea doasi foya
dere alakélé, dóló susupuratere alakélé, *dipula*
beteratere alakélé, erótua dapó. Dã nokekélé
wisiyóló fini, wotetamotei doasi depe tukó wei
kutó hãle ditu beterapó. ⁶ Atétu, dã me dere dowi
alatamo hoseké ini, mo donoi kisipatóró muóo,
bete mole ala mo wisiyóló kisipa yóo, me whipaae
setere ala ini, wisi kisipatamo naameiné mo dua
kaae taté fóo, du beterapó. Tétu, hosaa turóné
yaala sókó fole ala yópóló, Deji Kepe Wisiné dã

fotokọ eratepa, ai ala dią so whị feapaae erótua dapó. ⁷ Kótóné fotokọtamo mo fotóró duraalu, fo wisi yó mótua dapó. Tétu, Kótóné so whị donoratere alata, bóe dele whịné turu naasené tọ tawóo, fẹ naasené wuti tawóo dere kaae iruraalu, ai donoi ala dạné tarapó. ⁸ Mepaae whịné dạné ditere kutó kilitu dą dukiróo, mepaae whịné ti eratere fo yóo, dua dapó. Mepaae whịné dạné ditere kutó dorapóló mepaae so whịpaae yóo, mepaae whịné ti mo wisi kutó ditu betepapó yóo, dua dapó. Dą mo ala dere whị betepatei, mepaae whịné ti dą kapala atima dilikitere whịrape aqrótu betepapó. ⁹ So whị feané dą kisipa epatei, dą teó kisi wale whịrapepaae eratere ala kaae dua dapó. Dą mo felekemó sukunépatei, hąle bitiré fu betepapó. Dą fokosói ala yóló susupu eraletei, mo ti dóló sukunénipó. ¹⁰ Dą dekené sukutu betepatei, betere dokọ hẹkese yó tarapó. Dą fea ọla ọla munire whịrape betepatei, dạné du betere alané so whị fea néli whị beterótu betepapó. Dą ọla ọla munipatei, fea ọla mole whịrape betepapó.

¹¹ Korin bemó betó mole no nerape-ó, diątamo dạné hosaa mo turó muluraalu, dạné mole kisipa mo fea diąpaae hąkeamó ai yale ape. ¹² Dạné diąpaae yaala sókó fole ala dạné tao tani, mo turó erótu betepatei, diaaọ dąpaae yaala sókó fole ala ti kinóló tao tarapó. ¹³ Dią yąlo naale senaale kaae betereiteiné, diaaọkélé dąpaae hosaa mo turó muóló, yaala sókó fole ala u mótu i mótu yaasepóló, yąlo diąpaae i dere ape.

Kisipa tiró betere so whị tirénire whịtamo touyaqse ere fo

14 Diã Talepaae kisipa tiró betere so wh̄irape kisipa tirénire so wh̄itamo touyóló, dere ala fea betámó yaq̄se. Ti noatepae, donoi ala kolósu, dowi ala kolósu depa, betã ala ere? Ti ðemó kotere so wh̄iró dilikitamo kotere so wh̄itamo neteró fulumu enére? 15 Dã t̄eteróló kaae tare wh̄i Kerisoró dowi keperape t̄eteróló kaae tare kepe Belial-tamo touyóló betã kisipa muaaloé? Tuę tiki tiró betere so wh̄iró, tuę tiki tirénire so wh̄itamo betã ala ere? 16 Kótóné doi hale horóló moma dere beró kapala kótó s̄uróló aleale q̄larapetamo mo betã ala erapóló kisipa mute? Ti noatepae, ðã Keriso so wh̄ita, mo ti betere Kótóné momatere be t̄enapó. Ai yale fo kaae așemó Kótóné i fo erapó. “Ě atimatamo betámó bitu, atima fole tikipaae ękélé faalopó. Tétu, ę atima t̄eteróló kaae tare Kótó betóo, atima ti yało so wh̄i betóo, yaalopó.”

17-18 Mo doasi fotokq̄ bole Talené i fo dapó.

“Ai so wh̄itamo hosekéró beteretei taaróló ðã kaae betae. Atéru, mepaae naq̄se yóló fo mulale q̄la mo olaayaq̄se. I dere fotamo diaaq̄ sya fupa, ti yało ðã dape saalopó.”

Mo doasi fotokq̄ bole Talené i fo dapó.

“Ě ti diaaq̄ Aya betóo, ðã yało naale senaale betóo yaalopó,” erapó.

7

1 Hosaa mole no nerape-ó, Talené ðapaae ai wisi alarape eraalopóló muló betere fo h̄ale mulapa, kae kae dowi alané diaaq̄ tiki ó kepe do-raqsóró, ai kaae dowi ala tuamó hosekéró bitini,

tika kae betaalopa sae. Atéro Kótó kolóló witu-raalu, ą aqmó sukóló bitiré fóló, Talené ama mo kae ere wisi ala maaté eróló, mo ti fakeraté fu betae.

Pol hajné sukąle fo

² No nerape-ó, ąąpaae diaaą hosaa munire aąrapa, mióta ąąné ąąpaae hosaa mutere ala yaasepóló i dere ape. Ti noatepae, ąné mepaae so ó whįpaae me dowi ala eréni yóo, ąné du betere alané atima mepaae so whį dée naaire tų munéni yóo, ąné dere ala diaaą tokóló yópóló, ó ąąné mepaae wisi wisi ąła saai ąą dilikini yóo, yalepó. ³ Yąło i dere fo ąą só deraai kisipa mutu dumipó. Yąło take yale fo kaae ąąpaae ąné hosaa mo turó moleteiné ąą tekeni ąą sukutepa ó betepa, ti ąą fea betą alatóro du betenérápó. ⁴ Diaaą yąło i dere fo wosóló, mo sya faalopóló kisipa mutu ę whaalia ini, bopé fake yóló hajtu beterápó. Kae kae sekę ąąpaae wou betepatei, ąą Talepaae tuę tiróló wisi ala hąle yó tareteimó, ę haj yóló wisi kisipatamo Talepaae yąło mo kée du beterápó.

⁵ ąą Masedonia hae kwiapaae wóló bitu, Talené ala eratepa mepaae whįné ąné dere ala yaqsóro tų fea mo sesýalepó. Atétu, mepaae whįrapené ąątamo bóe dóló hąle sóo, ąné kepe tuąpaaekélé, wituraalu whaalia yóo, yaleteiné ąné tiki sąa nalóló bitinipó. ⁶ Téyaleteti, Taitus ąą beterepaae wale alané, fomoyóló haepaae doropole so whį tao sóro ketekę bulótu betere Kótónétei ąą tao sóro haj dere ala eralepó. ⁷ Ai

alané maaté mei, diaaḡ ą tao sóró haḡ dere ala eratepa, amamo ɔapaae ene waleteiné ɔa tao sóró haḡ eralepó. Diaaḡ ę kelenée du betereteikélé, diaaḡ haşókó fóló yale alamó ɔiané hosaamó su dekeḡé sukutu betereteikélé, ępaae erótu betere alamó diaaḡ whaaliala du betereteikélé, fea ɔapaae ene walepó. Ai fo wosetu, ę tuamó haḡ dere ala mo turó faayalepó.

⁸ Yaḡo ɔiapaae anale ašemó ere fonétamo ɔia dekeḡi kisipa moipa, yaḡo atei kaae fo noatepa yaleé? yóló kisipa mutumipó. Taketa atei kisipa mo mualetei, mió ę haḡ kisipa mutapó. ⁹ Ti ai haḡta ɔia dekeḡtere alamó ini, ai fo dosąaturaalu ɔia sawa sukamó maaté hosaamó sóró dekeḡyaleteiné yalepó. Atéteremó ɔia donoi tuḡpaae fole kilitu, ę haḡ du beterapó. Ti noatepae, ɔiané dekeḡ yale alata, ɔané yale foné ɔia mo ti doréni, Kótóné ama kisipa mole ala eraleteiné tu wisipaae feletei kisipa muae. ¹⁰ Kótó tuamó kaaróló wale dekeḡ dere alané dowi ala taaróló, Talepaae kisipa fetetere ala eratapó. Atéturaalu, kisipa fetetere alané, ti aluyaḡsóró tao sere ala kaaratapó. Take dekeḡi kisipa mualetei, yaḡo mió kisipa fatepa, mo donoi ala ereteiné Talepaae mo kée du beterapó. Tépaitei, i haemó kaarale dekeḡi alané ti sukutere ala kaaratapó. ¹¹ Kótó tuamó wale dekeḡi alané ɔia tuapaae erale alarape i ape. Kótóné ala eraai butere ketekękélé, me dowi ala inipatei, haḡle só deratere kapala fo so whinė mo nisi yaḡsóró, ketekę buóló haḡkearótu betere alakélé, dowi alatamo fopaae butereteikélé, mené ɔia doraḡsóró wisiyóló kele

muló betere alakélé, dią dątamo betené du be-
tale alakélé, so whı wisiyóló beterópóló ketekeş
bulótu betere alakélé, mené dowi ala deretei
hąkeamó kemerópóló, donoraai bole ketekeşkélé,
kale dekeş dere alané eralepó. Yąlo ašemó yale
forape diaaq dosąayóló ai fo mo wosóló sya
feleteiné mió dią tuąmó yąlo foné saai dere ala
muniretei hąkearalepó. ¹² Take yąlo diąpaae
ašemó yale fota, dowi ala dere whımó kisipa
mutu, ó ai dowi ala eraterere whımó kisipa mutu
inipó. Tényi, Kótóné keletómó dąné dere fo mopóló
wosóló eraaire ketekeş diaaqtei kisipa yópóló
yalepó. ¹³ Ai alarapené dą mo tao sóró ketekeş
bulalepó.

Ai ketekeş tómó dią feané Taitus-né ama kepe
tuąpaae felératerere ala eraleteiné ą mo hąjtamo
fesaae wale ala kilitu, dąkélé mo doa hąjyalepó.
¹⁴ Yąlo dią dukirótu ąpaae yale fo motóró
dokonótu, ą wisiyóló dape saleteiné ę hale ini,
feléi kisipa mutapó. Dąné diąpaae yó matere
fo fea motóró du dere kaae, dąné dią dukirótu
Taitus-paae yale fo ama mo irapóló kisipa yalepó.
¹⁵ Taitus aipaae wapa dią winé sukutu diri furu
furu yóló, naameiné diaaq ą mo wisiyóló dape
salepó. Take ama atéró ene wale fo diaaq
mopóló kisipa mutu wosóló, sya fele ala mió ama
kisipa duraalu, diąpaae yaala sókó fole ala mo
ti fąatapó. ¹⁶ Yąlo i dere fo fea diaaq wosóló
mo eraalopóló, yąlo kisipa tiróturaalu, ę mo doa
hąjné sukutapó.

*Hajtamo hɔle matere ala yɔpóló ketekɛ bu-
latere fo*

¹ Ne norape-ó, Masedonia hae kwiamó tɛ mole be huluamó betó mole Keriso fakerape Kótóné hamokoróló hɔle tao sóró male ala diaaɔ kisipa yaasepóló i dere ape. ² Ti ai so whɛ atima kɔae kelaai mepaae sekɛ wou be-taletei, hɛkesetere ala mo turó fɔayóo, mepaae ɔla ɔla ó *moni* meiyóló yoleale betóo epatei, atimamo hamokoyóló *moni* mo dekeró deralepó. ³⁻⁴ Atéro mo dekeró derɔleta yaletéiné sókó faai yale dɔle mo ti bosene felepó. Aita, atima kɔleaanétei Judia hae kwiamó Kótóné kae betero betere so whɛ tao saai kisipa mutu, mepaae so whiné hamokoróló hɔle derale *monítamo* touróló, atima mole ɔlakélé hajtamo deraai kisipa mutu, melaaire tɛ mulae yóló dɔpaae dotopoi fo yalepó. Ti aita, so whɛ hamokoyóló hɔle tao suraalu yale alapóló, yaɔo diɔpaae i dere ape. ⁵ Dɔné kisi-pane atima sɔmó enérápóló kisipa muale ala mo ti bosenóló, atimané yaai dere alakélé, ɔla ɔlakélé, betere betekélé, fea Talené naase tuámó mulalepó. Atéro nalo ti atimakélé dɔtamo touyóló Kótóné kisipa mole ala eraai yalepó. ⁶ Atérené, Korin bemó betó mole so whɛ diɔné ai ala yɔpóló, Taitus ɔ diɔ beterepaae fae yóló sɛyalepó. Ti aita, Taitus-né ama taketi kaae sóró diale kutó ereteiné, mió ɔ diɔ beterepaae wapa, Talené hamokoróló tao sere ala diaaɔ eróló mo ti kemerópóló yalepó. ⁷ Térapa, diaaɔ tuɛ tiki tiratere alakélé, fo wisi yó matere alakélé, mo bete mole ala kisipa dereteikélé, mepaae ala

eróturaalu, doasi ketekę bole alakélé, dąpaae yaala sókó fu betere ala alakélé mo wisirapó. Atétere kaaetóro hamokoróló tao suraalu, atéro hąle matere alakélé mo wisiyóló yae.

⁸ Yąło i dere fota, diąpaae i ala yae yóló dumi, Masedonia whırapené mepaae whı tao saai butere ketekę kolósu, diaaę butere ketekę kolósu yóló, dią tuąmó mo yaala sókó fole ala muluraalu, déro kąae kelaai dapó. ⁹ Ti noatepae, dą tęteróló kaae tare whı Yesu Kerisoné hamokoróló tao sere ala diaaę ai kisipare ape. Ti ą doasi néli whı beteretei, dią tao saai kisipa mutu, yoleale whı alée feleteiné dią néli whı beteralépó.

¹⁰ Diąné yaaitere alamó kisipa mutu, diąpaae yąło kisipa matere fo i dere ape. U kemeyale ba fomó mepaae kae kae be hulua Keriso fake so whıné *moni* deraaipa, diaaępi folosóro deróo yalépó. ¹¹ Diaaę atéro diale kutó ketekętamó kaae su yale kaae, miókélé ai alatóro deté fóló kemerae. Atéro melaai kisipa mutepa, ti diaaę mole sųtóro melae. ¹² Diaaę mole sųtóro wisi kisipatamo matepa, ti Tale ą hękese duraalu, ama kisipa feléyaalópó. Mepaae whıné melaaitere ęla munipa, ti Talené me ęlakó menipóló dei kisipa muaalo meipó.

¹³ Dąné kisiapané mepaae whırape atima ęla ęla mo dekéro muluraalu, dią sawa téti moleteiné sekę tuąmó beteraai dumi, fea betą alatóro yóló betaai i dere ape. ¹⁴ Mió dią ęla ęla mo dekéro moleteiné, atima yąyątere ęla diąné melóo, nalo diąmo yąyątepa atimané dekéro moletei dią melóo yópóló dapó. Atéro u tao su, i tao su depa,

ti mo fea beta ala yólótóró betaalopó. ¹⁵ Atétere alata, ašemó i ere fo kaaepó.

“Mepaae mo dekeró sale whiné ɔla buki muni feni, mo sümótóró nóo, mepaae mo tóróti sale whi wote ini, mo sümó nóo, yalepó,” erapó.

Taitus Korin bepaae dotɔyale fo

¹⁶ Ƴalo diɔ tao sɔpóló, ɛ ketekɛ bulale Kótóné Taitus-paaekélé ai kaae ala eró betepa, Kótópaae Ƴalo mo kée du beterapó. ¹⁷ Atéreteiné, ɔ ɖané fae depa waalo meitei, mo taketi diɔ beterepaae waai du betaletéiné waalopó. ¹⁸ Ɖané no whi beta Taitus-tamo wópóló dotonatapó. Ai whiɔta, mió wosetere fo wisi erateremó, Kótóné kae beteró betere so whiné dukirótu beterapó. ¹⁹ Ai ala maaté mei, kale haɔ melale *moni* sóró, ɖatamo Judia hae kwiamó betó mole so whimó male fópóló, Kótóné kae beteró betere Keriso so whiné ɔ sóró beteralepó. Atéro haɔ matere *monita*, Talené doi sóró horóturaalu, ai so whi tao saaire ketekɛ kolópóló kisipa mutu, ɖané hotowayóló tɛteróló kaae tawaai dapó. ²⁰ So whi tao suraalu, haɔ melale doasi *moni* ɖapaae diaaɔ hotowaró kaae tani, ɔlémi serapóló mepaae whiné ɖa er- atere fo yaqsóró kisipa mutu dapó. ²¹ Ti noa betené dumipó. Talené kele tómókélé, mo so whiné kele tómókélé, ɖané du betere ala mepaae whirapéné kilitu, mo donoi ala dapó yópóló kisi mutu, hotowayóló kaae tarapó.

²² Ɖané no me whikélé atimaamotamo doton- aai dapó. Ɔ kaae kelalemó, mepaae ɖané yae dere ala fea ai sekéné mo ketekɛtamo dua yalepó.

Diaaḡ mo wisi ala yaalopóló kisipa mutu, ama take bole ketekę tómó miókélé ą Talené ala eraai mo doasi ketekę bulapó. ²³ Taitus ąta, ętamo titiyóló kutó betámó diyóo, dią kuamó bitu betą kutó diyóo, dere whį beterapó. Dąné no me whį tamota, ti Kótóné kae beteró betere so whįné sóró beteró beterapó. Mepaae so whįné ai sekę tamoné ditere kutó kilitu, dą ęteróló kaae tare whį Kerisoné doi doasi hale sóró horatapó. ²⁴ Tęrapa, Keriso fake so whį feané diaaḡ yaala sókó fole ala haķeamó kolópóló, ai sore whįrapepaae mo erae. Atętepa, ti diaaḡ dere alamó dąné dukurótu betere fo mopó enęrapó.

9

¹ Kótóné kae beteró betere so whį tao sae yóló, deté wale fo wosóló, yaaire ketekę dią bunipakó, yało diąpaae momó yaaloé. ² Ti so whį tao saai diaaḡ bole ketekę yało mo wisiyóló kisiparapó. Dią ai ala yaai doasi ketekę boleteiné take kemeyale ba fomó kaae sóró, dią dukiróturaalu, Masedonia hae kwiamó betó mole so whįpaae dią Akaia hae kwiamó betó mole so whįmó hale melaaire *moni* deraai du beterapó fo yało deté kwęalepó. Ai fo woseturaalu, ai be huluamó betó mole so whį atimanékélé *moni* deraai hosaa tukalepó. ³ Diaaḡ hałe matere alamó dąné dią dukirótu betere fo bete muni nisiyaḡsóró, kale bope yale sore norapepi aipaae dotonatapó. Yało atimapaee, dią donoróló betepa kelaalopó yale fo dią tuamó motóró epa kolópóló yae. ⁴ Ti noa yaḡsóró dumipó. Mepaae Masedonia whįrape ętamo wouraalu, dią donoróló bitinipa kilitu, dąné dią

dukirale fo kapala irapó deremó, ðakélé ðiakélé mo doasi hale yaqsóro dapó. ⁵ Téyaqsóro, kale no-rape atimapi folosóro ðiã beterepaae dotonatepa wisirapóló kisipa mutapó. Ti noatepae, diaaḡ hamokoróló ḡle melaalopó yale *moni* deróló kemerópóló kisipa mutu i dere ape. Ai ala depa, ti sḡteremó dei kisipatamo meni, wisi kisipatamo hamokoróló ḡle melaalopó.

Hḡle matere alata, kutómó ḡla wae dekeró bilitu dere kaae dapó

⁶ I dere fo wosóló kisipa muae. Mepaae whjné ḡla wae sawa tóróti bilitapa, ti ḡla sere alimókélé sawatóró saalopó. Mepaae whjné ḡla wae dekeró bilitapa, ti ḡla sere alimókélé mo dekeró saalopó.

⁷ So whj dokḡ betḡ betḡ sḡtepa dei kisipatamo meni, atima kisipané meteró melaai depa, ti ai sḡtóró melópóló yae. Ti noatepae, hosaa tuḡmó ḡkesetamo matere whj Kótóné mo ḡkeserapó.

⁸ Atétu, Kótóné hamokoróló ḡle tao sere ala ðiḡpaae sḡratepa, betere dokḡ fea ðiã mepaae noa kaae wisi ala yaai depa, ti me ḡla yaḡḡni, mo sḡmó enérápó. ⁹ Aḡemókélé i fo kaae erapó.

“Ama wisi wisi ḡla yoleale yóló betó mole so whjmó ḡliralepó.

Ama so whj tao sóro donorate alakélé kemeni, ḡle yótóró tarapó,” erapó.

¹⁰ ḡla waeró mo nokole *bred* otamo matere Kótóné diaaḡ biliyaaire ḡla wae fakeróo, ḡla ḡlumétepa dekeró sóo dere kaae, Kótóné so whj tao sóro donorate alané du wisikélé diaaḡ mo ti fakeróo yaalo ai ape. ¹¹ Téturaalu, diaaḡ kae kae ala duraalu, mepaae so whj hamokoróló tao

sópóló, Talené diã mo sũraalo ai ape. Diãné atéro hãle matere ɔla dãnémo sóró kale yoleale so whimó matepa, Kótópaae atimané mo kée fo yaalopó.

¹² Kótóné so whi tao sóró diaaɔ ai eratere alata, atima yaɔɔtere ɔla mótua dapó. Ai maaté mei, Kótópaae doasi kée dere fokélé wɛi kaae fãayóló felée fu beterapó. ¹³ Diaaɔ atéro Talené ala eróturaalu, mepaae so whi tao sóró erótu betere ala mepaaené kilitu, ita Kerisoné fo wisi sya fóló aɔmó bituraalu, hamokoróló tao sere ala dãpaaekélé, mepaae so whipaaekélé, eratepa kelae yóló, Kótóné doi hale horaalopó.

¹⁴ Kótóné hamokoróló tao sere ala diã tuãpaae fãanó bettereiné Talepaae momaturaalu, atimané hosaa mo turó diãpaae muóló yaalopó.

¹⁵ Kótóné hamokoróló hãle meló betere ala wisinaale mo whiné etérapóló bete turó tokóló enénipó. Atéreteimó, ɔpaae mo kée fo du betae!

10

Pol Talené kutó dirateremó kae kae eratere fo yaletai

¹ Ẹ diãtamo betãmó betale sukamó, ɛ fo kóló kóló yóló wire whi aɔretei, kae tikimó bitu ti wini, halaaíné aɛtu beterapóló ɛ eratere fo ai du betere ape. Tépatéi, Talené fo aɔmó sukóló betere alaró witamo naameiné dua betere alatamo Kerisoné ɛpaae eratepa, ɛ ai ala tuãmó bitu, ɛ Pol-né diãpaae i yae dere fo wosóló, mo yaasepóló dapó. ² Ti ɛ diã betterepaae wale sukamó, mepaae so whiné kisipané dã i haemó

mole ala sya furaalu, Talené ala eraterere nisiyóló, dā eraterere so wh̄i ę halaainé foné saqsóró, diā miótitei donoróló betae yóló i dere ape. ³ Ti noatepae, dā i haemó h̄ale bituraalu dele bóeta, i haemó mo wh̄iné dele bóe kaae meipó. ⁴ Dāné bóe dele ęla ęlakélé, mo bóe dele ęla ęla kaae meipó. Dāné bóe dele ęla ęlata, Kótóné doasi fotokę faaneteiné Kótótamo bóe duraalu, ere dirii sa fisikóló doranerapó. ⁵ Mepaae so wh̄iné Kótó ę etei kaae Tale beterapóló kisipa yaqsóró sesé duraalu, kae kae fosó fosói foró, bete mole ęla aqraterere alatamoné sa kaae depa, dāné fisikóló dorótu beterapó. Téturaalu, dā tęteróló kaae tare wh̄i Kerisoné ala eraai mole kisipa kóppae faqsóró, dāné tuę tiki turó Yesuné tęteróló kaae tare aqmó mulóppóló, mo hotowaró kaae tarapó. ⁶ Diā Talené fo wosóló, aqmó sukóló bitu sya fóló erótu betepa, ti mepaae ai fo wosetere h̄oyóló dowęae fu betere so wh̄i fea dāné só deróló kwia melaai dā siki siki yóló betenerapó.

⁷ Diāta, mo tómó ere ala maaté kilitu beterapó. Mepaae wh̄iné ęta, Kerisoné wh̄i beterapó depa, ti dākéle ęre kaae Kerisoné wh̄itoró betereitei ama kisipa yóppóló yae. ⁸ Ita, diā só deróló doraai dumitei, Keriso tuamó diriyóló beterateere ala dāné tęteróló kaae tanóppóló, Talené dāppaae melalepó. Atérené ę haleni, halaainé diāppaae h̄akeamó i du betere ape. ⁹ Yęlo diāppaae ašemó i dere fota, diā wiraterere nisi yaęse. ¹⁰ Ti noatepae, mepaae wh̄irapené duraalu, “Ama ašemó deteraai fo du betepatei, ę woló betamó bitu dere fota, ti kisipa inire wh̄iné fo kaae h̄oko du beterapóló,” erótua

dapó. ¹¹ Atei kaae eraterere fo dere so wh̄iné, ɖa kae tikimó bitu ašémó dere fo kolósu, ɖa aipaae wóló mo dere ala kolósu depa, me ala kae mei, mo bet̄a alatóró epa kelaalopó.

¹² Mepaae wh̄irape atimané ditere kutómó atimatei doi sóró horótu dere kaae ɖané dumipó. Ti atimané du betere ala atimatei taleyóló atimata, etei kaae wh̄irape beterepó du beterepó. Tétu, atimané dere ala k̄aae kolóló u kolósu, i kolósu du betere alata, wisi tuę muluraalu dumipó. ¹³ Atima atépaitei, ɖata mo ɖané diale kutómótóró bopé faketu beterepó. Ti ɖané i ditu betere kutóta, Kótóné ɖapaae diyae yale ɖalemótóró dituraalu, ɖa bopé faketu beterepó. Ai ɖale muló betere kutó tuámó ɖiákélé ai bole ape. ¹⁴ ɖa fo wisi yó maté kuturaalu, ɖiɖa beterepaae uameisóró, ti etei kaae bopé fake dere ala uameipó. Tépaitei, Kerisoné fo wisi ɖiɖapaaekélé yó male waletiné ɖa mo donomó bopé fake dapó. ¹⁵ ɖané diyale kutó mupatei, kae wh̄iné diyale kutómó ɖa bopé fake dumi, mo ɖané ditere kutómótóró bopé faketu beterepó. Ti ɖiɖané kisipa tiró betere ala faketé fupa, ɖa ɖiɖa tuámó bitu ditere kutókélé mo ti fakeraai kisipa mutu, Talepaae tuę tiróló haɖtamo i betere ape. ¹⁶ Talené mió i wosetere fo wisi ɖané erateretei ɖiɖa tuámó faketepa, ti ɖiɖa betere tiki mo utéró betó mole so wh̄ipaaekélé yó maaté kweyaai kisipa mutapó. Mené diyale kutómóitei, ɖané yalepóló haɖe bopé fake yaqsóró, mepaae wh̄irapené yó menire tikipaae yó maté kweyaai dapó. ¹⁷ Tépaitei,

“Mepaae whi bopé fakeyaai depa, ti Talené fotokó ą tuąpaae sųraleteiné diyalepóló,” enérápó.

¹⁸ Ti me whiné ama diale kutó amatei fopeyóló, ątei dukiratepa, bete munipóló. Tépatei, Talené me whiné diyale kutó taleyóló wisirapóló depa, ti ai whiné kutó wisi diremó dapó.

11

Aposel aąre whırapené dere alata, Pol-né dere alatamo sųnipóló yale fo

¹ Yąlo du betere fota bete muni, hoko du betere fotei wosaasepóló i dere ape. Tépatei, ai hoko fo mo taketi yąlo deté wou betepa, diaaą woseté walepóló. ² Yąlo bole ketekęta, dią dokaai tukóló beteró betere whi mo ątamotóró fulumu yópóló, Kótóné matere ketekęné yąlo dią mo wisi yóló kaae taru, ma fo i dere ape. Me whiné folokole erénire so seimale kaae betepa, Kerisoné amatóró dokópóló kisipa mutu, yąlo dią tukóló beteralépóló. ³ Tépatei, wuliné fosó fosói ksipané Ipi dilikóló dée nalatu yale kaae, diąné tuę tikikélé mené kópaae ąlisó faąsóró yąlo doasi whaalia du beteramóló. Ti noa betené mei, dią Keriso ątamotóró dokaai, betą kisipa muóló beterópóló dapó. ⁴ Ti yąlo whaalia dereteita, hąle meipóló. Dąné diąpaae Yesu ą etei kaae whıpóló yó maleteti, mepaae whi dią beterepaae wóló Yesuta, etei kaae whi beteramóló hoko fo yó matepa, diaaą mopóló wosetu beteramóló. Atétere kaae, take diaaą sale Dęi Kepe Wisi betepatei, me kepe kae saalopóló de? Take dąné diąpaae yó male fo wisi mupatei

taaróló, kisipa tiki okokore whiné dere kaae, mió diã kae yó matere kisi fo wosaai ekęletu beterapó. ⁵ Ti ai whırape atimata, doasi doi mole *aposeł* whırapepó du betepatei, atimané ę teteró bitinipó. ⁶ Ti so whı feapaae Talené fo yalo fosó fosó yóló yó melópoló mené ę yó menitei, bete mole fo yalo mo kisiparapó. Ai ala diãnekélé kisipa yópoló, kae kae ala fea haķeamó erótu betalepó.

⁷ Kótóné fo wisi yó móturaalu yalotei ę deróo, diã tao sóró horóo, du betalepó. Tétu, yalo diãpaae *monikó* alaie yóló kema ini, hale yó mótu betaletei-a, diãpaae dowi alakó erótu betaleé? ⁸ Aita, diã seķę yaqsóró kisipa mutu, kae be hulua Keriso fake so whiné matere *monitei* yalo ęlémi kaae sóró, ę betaaire be ó ęla dupu yóló nukuraalu, diã tao saaire kutó betã dité fu betalepó. ⁹ Ę diãtamo betale sukamó diã seķę yaqsóró, ę yaķãtere ęla diãpaae alaie yóló wosetere fokélé inipó. Ę yaķãtere ęlata, Masedonia hae kwia taaróló, ętamo wale norapené tao sóró mótua yalepó. Ę me ęla yaķãtepatei, diã seķę yaqsóró woseni, Talené kutó hale dirótóró tawalepó. Nalopaaekélé ai alatóró enérápó. ¹⁰ Ti Kerisoné bete mole mo fo ę tuãmó moleteiné diãpaae diriyóló i dere ape. Ę me dupu sini, ai fo wisi hale yó materemó, yalo i bopé faketere ala Akaia hae kwiamó betere whırapekó betãnekélé bete munire ala aķraalomeipó. ¹¹ Yalo diãpaae etei kaae dere fo-a, noa betené dapóló kisipa mute? Yalo diãpaae yaala sókó fole ala initepa de? Meipó. Diãpaae yaala sókó fole ala ę tuãmó

moletei, Kótóné ama mo kisiparapó. ¹² Kae fo yó matere wh̄irapené du betere alata, so wh̄iné atima dukirópóló dapó. Aita, ðané dere alaró atimané dere alatamo bet̄a ala erapó yópóló, bopé fake du betera. Atei ala yaaire t̄u mulaqsóró ða *moni* sini, kutó h̄ale diró tawaalopó.

¹³ Ti ai wh̄irapeta, Kerisoné dot̄eyale mo *apotel* wh̄irape mei, so wh̄i dilikóló kapala kutó diratere *apotel* wh̄irape bitutei, Kerisoné kutó diratere nisi yópóló, aqtu betera. ¹⁴ Ai kaae alamó ða kilita sókó fenénipó. Ti noatepae, Satan a ðe tuamó betere *ensel* aqtu betereitei, ðané kisiparapó. ¹⁵ Atétere kaae, ama kutó diratere wh̄irapekélé mo donoi kutó diratere wh̄irape aqtu betere ala kilitu, ða kilita sókó fumipó. Ti atimané ai du betere alamó saaire dowi dupu h̄asókó feni, mo donotóró melaalopó.

Pol q̄paae sek̄ei ala erateremó bopé fakeyale fo

¹⁶ Ȳalo yale fo kaae momó dapa i wosae. Dīa mepaae wh̄iné ē kisipa okokoi wh̄i betere nisi yaq̄se. Diaaqtamo ē kisipa okokoi wh̄i betera kisipa mutupa, ti ē bopé faketuraalu, okokoi wh̄iné dere fo kaae, sawa i dapa wosae. ¹⁷ Fea ala ȳalo sumó enérápóló bopé faketuraalu dere fota, Talené dere fo kaae meitei, kisipa okokoi wh̄iné dere fo kaae dapó. ¹⁸ I haemó betó mole wh̄irapené nene yóló bopé faketera ala feané sya fóló du betepa, ti ekélé nene yóló bopé fakeyaalopó. ¹⁹ Ti fosó fosóre wh̄i dīata, mepaae kisipa okokoi wh̄iné du betere ala yaqsóró seséni, h̄ekesereteiné yópóló, kaae tarapó. ²⁰ Ti dīané mo du betere alatóró i ape. Mepaae wh̄iné dīa wae

sóro kutó diratere wh̄i beteróo, diḡné wisi wisi ḡla atima saai diḡ dilikóo, diḡ me ala tuḡnire wh̄i aḡróló, atimané tuḡ mole ala eróo, atima doasi doi saai dapóló diḡ hepée faróló atimapi folosene fóo, atimané diḡ okolope deké sóo, dua dapó. Ai alarape eratepa, atimapaee atékese yóló foné sini, diḡ haḡle betó mulapó. ²¹ Ti ḡa béreteiné atei kaae ala diḡpaee eranénipóló, ḡ haletu i dere ape.

Kisipa okokoi wh̄iné dere fo kaae i dapa wosae. Mepaae wh̄i dené ama du betere alamó ḡ bopé fake yaaitepa, ti ḡkélé bopé fakenérápó. ²² Atima Hibru fake so wh̄iné dere ala sya fu betere so wh̄i betere? Atima atépa, ti ḡkélé Hibru wh̄itóró beterapó. Atima Israel hae tale betepa, ti ḡkélé Israel hae taletóró beterapó. Atima Abrahamné deté wale wh̄irape betepa, ti ḡkélé Abrahamné deté wale wh̄itóró beterapó. Atima Kerisoné ala eratere wh̄i betere? Atépa, ti ḡ keyaa fu-raalu ḡoko dere fo i ape. Yḡlo ai kutó ditere alané atima fea mo teraae falapó. ²³ Yḡlo i dere fota, topo doyóló keyaa fole wh̄iné fo kaae ḡoko dapó. Atima Kerisoné kutó diratere wh̄i betere? Atépa, ti yḡlo ditere kutó kolósu, atimané ditere kutó kolósu depa, atima yḡlo mo bosenó beterapó. Ti yḡlo dité wale kutó atimané diyale kutótamo s̄uni, ḡ mo doasi depe tukó wei kutó ditu betalepó. Ti ḡta, mo dekeró félimó *dipula* beterótua yóo, fokosoi ala yale tikimó yḡlo tiki mo turukée fóo, ḡ mo felekemó sinitai kepaayóo dua yalepó. ḡpaee ai erótu betale hapólui ala kaae, atimapaee erénipó. ²⁴ Juda fakené ḡ aporó félimó halika kaae ḡlané yḡlo

tikimó daletei dokọ sóró touróturaalu, 39-rópó. ²⁵ Sore fapo atimané ẹ biyàné fokosói ala yóo, betà be òmó ti kapo duné siriyóo, sore félimó ti ẹ betere wẹi nuku fetée fóló do yóo yalepó. Tétu ẹ doasi wẹi kẹla tómó ọlaae kutu betepa, be ò betaró diki betatamo kemeyalepó. ²⁶ Ẹ betà bemótóró bitini, be hulua dokọ fiyósu deté kutu betalepó. Atéturaalu, doasi fole wẹi tikiné ẹ aluranépati, tẹyóló fua yóo, ọlémi whịrapenékélé ẹ denépati, atima betere tuámó fóo, mo yàlo be whịnékélé ẹ denépati fua yóo, Juda meire fake whịnékélé ẹ denépati atima tuámó bitiré fóo, doasi be huluamó bitukélé, ipumó bitukélé, doasi wẹi kẹla tómó fukélé, Keriso norape aṣe whịrapetamo bitukélé, ẹ mo dóló aluranépati, bitiré fóo yalepó. ²⁷ Ẹ kutó dituraalukélé depe tukó wei ala yóo, kutó ditétóró fu betereteiné nokekélé fini yóo, woteró wẹi nokoletamo epatei, haṣe fitua yóo, kutikélé ó sikélé meiyóló sosóliné sukọo dua yalepó. ²⁸ Ai alarape tómó, Kótóné kae beteró betere Keriso fake so whị noa tumó wisi yóló betaaloé yóló, doasi whaalia duraalu, ẹ doasi seṣe beleté fu beterapó. ²⁹ Diakó me whị Talené ala eraaire fotokọ meiyóló bétapa, ti ẹkélé bératapó. Diakó me whị dowi alapaae ọlísóró fóló dée nukupa, ti ẹkélé dei kisipa mutu haletapó.

³⁰ Ẹ bopé fake yaaitamo kisipa mutepa, ti ẹ tuámó fotokọ mei, bére ala so whị feané kolópóló, bopé faketerere ala mo haṣeamó yó manérápó. ³¹ Yàlo i dere fota, mo kapala dumipó. Betere dokọ so whị feané doi sóró hurótu betere Tale Yesuné Alima Kótóné yàlo i du betere fo mo

dapóló ama tuérapó. ³² Ẹ Damaskus bemó betepa, botokó faṣóró topo whì Aretasiné be kaae tanópoló, sóró betero betere whìné ẹ tawópoló, ama diki tare whìrape kale be bolaare dopóku tų dokó sóró beteralepó. ³³ Téyaleteti, mepaae norapené ẹ yomó deyóló halika duóló deralepó. Atéyaleteti, ai be hulua bopére dopóku sikimó, dẹ saai muló betere dolomó sókó faraleiteiné atimané ẹ tani, haşókó felepó.

12

Pol-né ama nokené kaae kelale ala

¹ Ẹ i bopé faketu betere ala taaréni, haḷe deté fu betenérápó. Ti bopé faketeri ala tuámó me ke bunitei, Talené ẹpaae nokené kaae yó melale alaró kinó betere alatamo haķearaletei betą diąpaae i dapa wosae. ² Ita mió yale ala dumitei, i ala yóló betepa, 14-ró ba fo kemeyalepó. Ai ala kelale whì ą ama tiki turó fele ó, kepe maaté feleró ẹ tuęni, Kótóné betą kisiparapó. Ai whì ą Keriso tuámó betepa, mené ó hepen bepaae dapesó huturaalu, saķélé sa taoró ere tikikélé taaróló, mo hepen bepaaetóro dapesó holale whì yaḷo tuérapó. ³⁻⁴ Ti ai sekęta, mo kelaalo kokọi bepaae dapesó horóló beteraleteti yaḷo kisiparapó. Ẹ atéro huturaalu, ama mo tiki turó felepé kepe maaté feleró ẹ tuęni, Kótóné betą kisiparapó. Mené fo depa ai sekęné ama wosalemó, bete etérápóló mo hae whìné yókéle enénipó. Ai fo hae so whìpaae uątei, yaṣóró Talené doasi fo mulapó. ⁵ Atei ala ere whìpóló

kisipa mutu, ę bopé fake uętei, yęłotei ę bopé fake-
enépa taaróló, ę hae whį bitu, yęło bére alarape
betę dięné kisipa yaasepóló i dere ape. ⁶ Yęło
kisipanétamo bopé faketerere ala yaaitepa, ti yęło
mo yale alatóró dereteiné ę topo doyóló okokoi
whįné dere fo kaae uęameipó. Ti yęło yó mótu
betale mo foró du betale alatamo dięné kęae
kolóló tuę yóppóló, bopé faketerere ala enépaitei, ę
doasi doi mole whį nisi yaęsóró taalatapó.

⁷ Talené doasi kinó betere ala ępaae hękeróló
yó maleteiné ę topo whį bitu bopé fake yaęsóró,
Satan-né dotęyale kepené dowi mu képiné kaae,
ę susupuróppóló Kótónétei ai tę mulalepó. ⁸ Até
yaleteiné yęło tikimó doasi dele supa, Talepaae
ai ala tokóló taae falae yóló sore félimó yalepó.
⁹ Téyaletei ama ępaae duraalu, “Ai sekei ala naao
sumó beleyóppóló, yęło hamokoróló hęle tao sere
ala yę tuępaae mo sęraalopó. Ti noatepae,
mo whįné enéni bére ala tuęmó yęło fotokę so
whį feané kolóppóló, mo hękeamó erótua dapó,”
yalepó. Atétereteiné Kerisoné fotokę ę tuęmó
hęle muó tanóppóló, yęło enéni bére alapóló tuę
muturaalu, ę hęjyóló bopé faketerere ala taaréni,
hęle yó tawaalopó. ¹⁰ Atétereteiné Kerisoné ala
mo ti fakeraairaaalu, bére ala tuęmó bitukélé,
mepaaené ę eraterere fo du betepakélé, doasi sekei
ala tuęmó bitukélé, Talené ala erótu betepa sere
sekei tuęmókélé, doasi hapólui ala tuęmó bitukélé
hęjıtamo beterapó. Téru, mepaae bei ala tuęmó
bitukélé fotokę hęle bulapó.

Pol-né Korin so whį doasi whaaliatu yale fo

¹¹ Ti yałotei ę kisipa okokoi whjné dere fo kaae yaleteita hałe mei, diaaę du betere alanétei ę ai ala dere whj aęratepa yalepó. Yało du betere alamó diaaę ę dukiraterere fo uęsóró ti mo wisi uępó. Ti noatepae, ę belei sokótei kolósu, ai doasi doi mole *apospel* whjrape kolósu depa, atimané ę tęteró bitinipó. ¹² Ti ę dię tuęmó bitu, me ala yaairemó dere alarapekélé, sira yópoló eraterere alarapekélé, mo whjné enénire doasi kelemei alarapekélé, fea eró taté fu betalepó. Ai alarape kilitu, ita mo *apospel* whjné dapó enérapó. ¹³ Ti ę mepaae be hulua mó Kótóné touróló beteró betere so whjpaae erale ala kolósu, diępaae erale ala kolósu depa, me noa alakómo diępaae erénié? Atimapaakélé, diępaaekélé, betę kaae alatóró erótua yalepó. Ti ę yaęęterere ęla tao sae yaai yaletei, dię sekę yaęsóró ini, taaralepó. Kae kae Keriso so whjpaeta dua yaletei, diępaae inire ala dorapó kisipa mutepa, ti dięné kwia tani, hałe kemerae.

¹⁴ Ę mió sore dakeróló dię kęle waai i du betere ape. Ę aimó wóló bitu, be ó nokole ęla dię sekę melaalomeipó. Ti noatepae, diaaę me ęlakó melópoló waai dumitei, dię mo no apu aleyóló betęmó betaai kisipa mutu, walapó. Ti naale senaalené hama alima tao saai dapóló mepaae ęla ęla betępaae yóló mutumitei, hama alimané naale senaalemó ęla ęla mulaterere dua dapó. ¹⁵ Atétere kaae, ę mo hękesetamo dię tao saairaalu yało ęla ęlakélé, yało betere betekélé melaalopó. Yało diępaae mo turó yaala sókó fu betepatei, dięnémo ępaae yaala sókó fole ala

sawa tómó maaté dere-a, wisire? ¹⁶ Diaaḡ ę heḡese inire aḡpatei, yaḡo diḡpaae me seḡei ala erénipó. Tépaḡei, ba ó nané nale wópóló, ęla wisi mulótu dere kaae, diḡné *monikó* ę melópóló kisipa mutu, yaḡo diḡ dilikęale aḡrapó. ¹⁷ Diḡ tao sópóló yaḡo dotęyale whḡrapené ó yaḡokélé diḡ dilikóló, diaaḡ noa wisi wisi ęlakó saleé? ¹⁸ Taitus ę ḡané no me whḡtamo diḡ beterepaae wópóló, yaḡo seḡyóló dotęyalepó. Até yale be ḡemó, Taitusné diḡ dilikóló mepaae ęlakó saleé? Talené ala eróturaalu, ḡamo wusuró betę tuę muóló, betę alatóro erótua inié?

¹⁹ Ti yaḡo diḡpaae aḡetu betere fo diaaḡ doḡaḡaté waḡetei-a, mené ḡa só deraḡsóro seséturaalu ḡapóló kisipa mute? Meipó. ḡané i du betere fota Keriso tuḡmó bitu, Kótóné keletómó mo i dere ape. ḡané hosaa mole no nerape-ó, ḡané i du betere ala feata, diḡ fotokę buóló beterępóló ḡapó. ²⁰ Ti noatepae, ę aipaae wale sukamó, diḡ mo wisiyóló betepa kelenée dere ala diḡ tuḡmó ini yóo, diḡnékélé ę tuḡmó epa kelenée dere ala ę tuḡmó inipa kelaalomolópóló, ę doasi witu beterapó. Ę diḡ beterepaae wóló kele-nalemó, diḡ tuḡmó ḡęle fokélé, me whḡné dere alamó dei tuę mutere alakélé, fopaae buóló ḡęle sere alakélé, fake teketere alakélé, dowi fopaae butu me whḡ yóló sininatere alakélé, kikiti er-aterere fokélé, dowęae fóló bopé faketere alakélé, wisiyóló bitini, ḡęko betere alakélé, ai alarape fea diḡ tuḡmó epa kelaḡsóro, ę doasi whaaliatu beterapó. ²¹ Ę diḡ beterepaae wale sukamó diaaḡ ai dere ala kilitu, ę tęteróló kaae tare Kótóné

keletómó, ę momó halenérápóló wi dapó. Mo take dowi ala du betale so whjné mepaae hosekéyóló du betale dowi alakélé, nópu nokole alakélé, enénire sonaalei dowi alakélé taaréni, hęle yótóró tapa kilitu, ę dekeę yaqsóró whaalia duraalu dapó.

13

Dię Yesu Kerisopaae kisipa mo tiró beterémóló diaaqtei kęae kelae

¹ Mió yęlo dię sore dakeróló kęle waai i dere ape.

“Mepaae so whjné hęsóké fóló dere alarape tale-turaalu, betę whjné dere fo maaté woseni, tamo ó sore whjné i ala mo depa kelalepó dere fo wosóló, ti taleyóló donoranérápó,” erapó.

²⁻³ Ę tamo dakeróló dię kęle wale sukamó, dowi ala dere so whjpaee etei kaae sekeęi ala eraalopóló diępaee yalepó. Mió ę kae tikimó bitukélé betę kaae fotóró momó i dapa wosae. Kerisoné du betere fo yęlo mo dapóló diaaq kisipa yaasepóló, ę wouraalu take dowi ala deté wale so whjró mepaae dowi ala du betere so whjtamo kwia matere ala kęleturaalu taaréni, mo melaalopó. Ti Keriso ęta, dię tuęmó mole dowi alarape donoraaitere ala ę béni, fotokę mo turó bulapó. ⁴ Ti i dere fota, mo dapó. Keriso ę fotokę buni bére whj aęyóló, atimané ę filipaare ni tómó daletei, Kótóné fotokęné ę mo beterapó. Atére kaae, dę fotokę buni bére whjrapetei Kótó ętamo betęmó bettereteiné ama fotokę dę tuępaee sęratepa, dię tao saai Talené kutó hęle diraté fu beterapó.

⁵ Diã Yesu Kerisopaae tuę tiki tiró betere ala diaaętei kãae kólóló taleyae. Aténalemó, Yesu Kerisopaae kisipa tiratere ala inipa, ti ya ą tuámó bitinipóló kisipa muae. ⁶ Ti diaaę dą kãae kolóló talenalemó, Yesu Kerisopaae tuę tiki tiró betere ala epa, ti diaaę mo haękeamó kelenérápóló kisipa mutapó. ⁷ Diã me dowi ala yaęsóró, Kótópaae suka fea dąné momarótu beterapó. I dere fota, Talené dą kãae kolóló, whı wisipó deremó so whjné dą dukirópóló dumitei, dąné hoko dere alamó só deró betere whırape aępa, diãta mo donoi ala wisi du betere whı betaasepóló dapó. ⁸ Kale bete mole mo fotamo dąné bóe dóló me ala enéni, ai fo wisi fakeratere ala betą enérápó. ⁹ Dą fotokọ buni bépatei, diã mo doasi fotokọ buóló betepa, ti dą mo haırapó. Dąné diãmó momarótu betere alata, diã haepaae derepeletei, momó Talené ala eraté furaalu, diã mo ti diriyóló beterópóló dapó. ¹⁰ Atére betené, ę diã beterepaae waai teópatei, yało i aętere fo kolóló diąsisi bitu, mepaae diã tuámó ere alarape donoraasepóló i dere ape. Ti noa yaęsóró mei, Talené ępaae ama so whı tęteróló kaae tawae ere fo sya furaalu, ę aipaae wale sukamó diã deteraayóló foné saęsóró dapó. Ti Talené ę diã tęteróló kaae tawópóló sóró beteraleteita, diã doróló só derópóló ini, tao sóró wisiraté fıppóló yalepó.

Kemeróturaalu kęleó yale fo

¹¹ No nerape-ó, mo kemeróturaalu diãpaae kęleó i dere ape. Me haęsóko fole ala diã tuámó muni, Talené ama ala mo donoyóló erae ere

dąlemótóró sókó faasepóló, hotowaró erótu betae. Aşemó yąlo diąpaae i yae dere fotóró mo wosóló, dią fea mo betą kisipatóró mulu, hosaa muni deyóló mo dua betó muae. Atétepa, ti yaala sókó fole alaró hosaa muni deyóló dua betere alatamo, matere Kótó ą diątamo betaalopó.

¹² Dią Kótóné mo kae beteró betere so whı bitu, diąsisi yaala sókó fóló, aputu betae. ¹³ Imó ętamo Talené kae beteró betere so whı feané diąpaae kęleó dapó.

¹⁴ Dą ęęteróló kaae tare whı Yesu Kerisoné hamokoróló hąle tao sere alakélé, Kótóné yaala sókó fole alakélé, Dęi Kepe Wisiné eratere u yó mótu i yó mótu dere alakélé, dią feapaae eró tanóppóló yae.

**Yesu Kerisoné So Whi Tao Sere Kisi Fo Wisi
The New Testament in the Folopa Language of Papua
New Guinea**

Nupela Testamen long tokples Folopa long Niugini

copyright © 2005 Wycliffe Bible Translators, Inc.

Language: Folopa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 11 Nov 2022 from source files dated 9 Oct 2020

4e9b4b04-0b47-5583-9c4d-fb82cfdd65c2